

Bil yr Amgylchedd Hanesyddol (Cymru)

Canlyniad Ystyriaeth Fanwl y
Pwyllgor

Mawrth 2023



1. Y Bil a'r cefndir i Ystyriaeth Fanwl y Pwyllgor

Ar 4 Gorffennaf 2022, cyflwynodd Mick Antoniw AS, y Cwnsler Cyffredinol a Gweinidog y Cyfansoddiad ("y Cwnsler Cyffredinol") Fil Cydgrynhoi cyntaf Cymru, sef Bil yr Amgylchedd Hanesyddol (Cymru) ("y Bil") i'r Senedd.¹

1. Teitl hir y Bil yw:

"Deddf gan Senedd Cymru i gydgrynhoi deddfiadau penodol sy'n ymwneud â chadwraeth amgylchedd hanesyddol Cymru."

2. Yn y Memorandwm Esboniadol sy'n cyd-fynd â'r Bil, mae'r Cwnsler Cyffredinol yn dweud:

*"Yr hyn a olygir wrth gydgrynhoi yw dwyn ynghyd y cyfan neu'r rhan fwyaf o'r ddeddfwriaeth (sylfaenol, gan amlaf) ar bwnc penodol fel ei bod yn hawdd dod o hyd iddi, a moderneiddio ffurf y gyfraith a'r modd y caiff ei drafftio er mwyn ei gwneud yn haws ei deall a'i chymhwyso. Yn aml, wrth gydgrynhoi deddfwriaeth, mae nifer o Ddeddfau sy'n bodoli eisoes ar bwnc yn cael eu dwyn ynghyd, gan ddiweddarau a chysoni'r darpariaethau, er mwyn creu Un Ddeddf newydd yn y pen draw."*²

3. Cyfeiriodd Pwyllgor Busnes y Senedd y Bil at y Pwyllgor Deddfwriaeth, Cyfiawnder a'r Cyfansoddiad ar 4 Gorffennaf 2022 ar gyfer Ystyriaeth Gychwynnol.³

4. Gwnaethom gyflwyno adroddiad ar ein hystyriaethau cychwynnol ar 23 Rhagfyr 2022.⁴

¹ [Bil yr Amgylchedd Hanesyddol \(Cymru\)](#), fel y'i cyflwynwyd

² Llywodraeth Cymru, [Bil yr Amgylchedd Hanesyddol \(Cymru\)](#), Memorandwm Esboniadol, Gorffennaf 2022, paragraffau 1 a 2

³ Y Pwyllgor Busnes, [Amserlen ddiwygiedig i'w hystyried: Bil yr Amgylchedd Hanesyddol \(Cymru\)](#), Hydref 2022

⁴ Y Pwyllgor Deddfwriaeth, Cyfiawnder a'r Cyfansoddiad, [Adroddiad ar Fil yr Amgylchedd Hanesyddol \(Cymru\)](#), Rhagfyr 2022

- 5.** Ysgrifennodd y Cwnsler Cyffredinol atom ar 12 Ionawr 2023 gan ymateb yn benodol i argymhelliad 10 yn ein hadroddiad.⁵ Ysgrifennodd y Cwnsler Cyffredinol eto ar 18 Ionawr 2023, a darparodd ymateb i'r argymhellion eraill yn ein hadroddiad.⁶

- 6.** Cynhaliwyd dadl yn y Cyfarfod Llawn ar 17 Ionawr 2023. Derbyniwyd cynnig i gytuno y dylai'r Bil fynd rhagddo fel Bil Cydgrynhoi.⁷

⁵ Llythyr gan y Cwnsler Cyffredinol, 12 Ionawr 2023

⁶ Llythyr gan y Cwnsler Cyffredinol, 18 Ionawr 2023

⁷ Y Cyfarfod Llawn, 17 Ionawr 2023

2. Ystyriaeth Fanwl y Pwyllgor

Dechreuodd y Pwyllgor ei Ystyriaeth Fanwl ar 18 Ionawr 2023, ar ôl i'r Senedd gytuno y dylai'r Bil fynd rhagddo fel Bil Cydgrynhoi.

- 7.** Cytunwyd ar 16 Ionawr 2023, o dan Reol Sefydlog 26C.27, y byddai'r drefn ystyried ar gyfer trafodion Ystyriaeth Fanwl y Pwyllgor fel a ganlyn: adrannau 2 i 75; Atodlenni 1 a 3 i 6; adrannau 76 i 157; Atodlenni 2 a 7 i 10; adrannau 158 i 166; Atodlen 11; adrannau 167 i 191; Atodlen 12; adrannau 192 i 213; Atodlenni 13 a 14; adran 1; a'r teitl hir.
- 8.** Ar 24 Ionawr 2023, cyflwynodd y Cwnsler Cyffredinol 45 o welliannau i'r Bil; cyhoeddwyd y rhain mewn Hysbysiad ynghylch Gwelliannau.⁸ Hefyd, ysgrifennodd y Cwnsler Cyffredinol at holl Aelodau'r Senedd i roi manylion y gwelliannau a gyflwynwyd i'r Bil, ynghyd ag esboniad o'u diben a'u heffaith, a darparodd ddogfen yn dangos sut y byddai'r newidiadau arfaethedig hyn yn diwygio'r Bil.⁹
- 9.** Ar 6 Chwefror 2023, cyhoeddwyd ail Hysbysiad ynghylch Gwelliannau, yn cynnwys saith gwelliant i'r Bil a gyflwynwyd gan James Evans AS.¹⁰
- 10.** Cafodd y Bil ystyriaeth fanwl gan y Pwyllgor ar 13 Chwefror 2023.¹¹ Ar gyfer trafodion Ystyriaeth Fanwl y Pwyllgor, lluniwyd Rhestr o Welliannau wedi'u Didoli a Grwpio Gwelliannau ar gyfer eu trafod.¹²
- 11.** Gwnaethom gytuno ar bob un o'r 45 gwelliant a gyflwynwyd gan y Cwnsler Cyffredinol. Gwrthodwyd y gwelliannau a gyflwynwyd gan James Evans AS, yn ymwneud â diogelu safleoedd llongddrylliadau hanesyddol.
- 12.** Yn ystod y ddadl ar y gwelliannau yn ymwneud â gwarchod safleoedd llongddrylliadau hanesyddol, cytunodd y Cwnsler Cyffredinol i roi manylion i ni ar sut y bydd Llywodraeth Cymru yn bwrw ymlaen â chynlluniau i adolygu'r holl

⁸ Bil yr Amgylchedd Hanesyddol (Cymru), [Hysbysiad ynghylch Gwelliannau - 24 Ionawr 2023](#)

⁹ [Llywodraeth Cymru: Tabl Diben ac Effaith](#) - 25 Ionawr 2023; [Llywodraeth Cymru: Eglurhad o welliannau arfaethedig y Llywodraeth](#) - 25 Ionawr 2023

¹⁰ Bil yr Amgylchedd Hanesyddol (Cymru), [Hysbysiad ynghylch Gwelliannau - 6 Chwefror 2023](#)

¹¹ [Y Pwyllgor Deddfwriaeth, Cyfiawnder a'r Cyfansoddiad, 13 Chwefror 2023](#)

¹² Bil yr Amgylchedd Hanesyddol (Cymru), [Rhestr o welliannau wedi'u didoli - 13 Chwefror 2023](#); Bil yr Amgylchedd Hanesyddol (Cymru), [Grwpio Gwelliannau - 13 Chwefror 2023](#)

ddeddfwriaeth yn y maes hwn a'r amserlen ddisgwyliedig ar gyfer ymgymryd â gwaith o'r fath.

13. Ysgrifennodd y Cwnsler Cyffredinol atom ar 1 Mawrth 2023, gan ddweud:

“Mae'r Llywodraeth yn cytuno ag argymhelliad 6 o adroddiad y Pwyllgor ar ei Ystyriaeth Gychwynnol o'r Bil bod angen adolygiad o'r amddiffyniad deddfwriaethol a roddir i'r amgylchedd hanesyddol morol. Bydd adolygiad o'r fath yn ymgymeriad sylweddol oherwydd natur amrywiol yr asedau hanesyddol dan sylw, y galwadau cynyddol ar yr amgylchedd hanesyddol morol a chymeriad cymhleth y fframweithiau amddiffynnol sydd ar waith. Yn ogystal, mae'r broses o reoli gweithgareddau yn nyfroedd Cymru yn cael ei rhannu rhwng swyddogaethau datganoledig a swyddogaethau a gedwir gan Lywodraeth y DU.

Er mwyn cynnal yr adolygiad yn effeithiol, bydd angen i Lywodraeth Cymru gasglu tystiolaeth, ymgysylltu â rhanddeiliaid a gwerthuso'r ddeddfwriaeth bresennol yn drylwyr. Bydd Cadw yn ceisio gweithio gyda Chomisiwn Brenhinol Henebion Cymru a chyrrff cyhoeddus eraill i ddatblygu'r sail dystiolaeth er mwyn llywio'r adolygiad. Ein nod yw asesu effeithiolrwydd y ddeddfwriaeth bresennol erbyn diwedd 2024.

Bydd angen ystyried y camau nesaf yn dilyn yr adolygiad hwnnw, boed yn ddeddfwriaethol neu'n anneddfwriaethol, ynghyd â blaenoriaethau eraill Llywodraeth Cymru ar y pryd.”¹³

14. Ar ddiwedd trafodion Ystyriaeth Fanwl y Pwyllgor, gwnaethom ofyn i'r Cwnsler Cyffredinol a oedd o'r farn bod angen cyflwyno gwelliannau pellach i'r Bil. Ymatebodd y Cwnsler Cyffredinol nad oedd o'r farn bod angen.¹⁴

15. Cadarnhaodd y Cwnsler Cyffredinol hefyd, yn unol â Rheol Sefydlog 26C.37, y byddai'n paratoi Memorandwm Esboniadol diwygiedig a fyddai'n adlewyrchu ymrwymadau a wnaed yn ystod yr Ystyriaeth Gychwynnol a diwygiadau a wnaed i'r Bil yn ystod Ystyriaeth Fanwl y Pwyllgor.¹⁵

¹³ Llythyr gan y Cwnsler Cyffredinol, 1 Mawrth 2023

¹⁴ Y Pwyllgor DCC, 13 Chwefror 2023, Cofnod y Trafodion [146] a [147]

¹⁵ Y Pwyllgor DCC, 13 Chwefror 2023, Cofnod y Trafodion [139] a [148]

16. Cyhoeddwyd y Bil, fel y'i diwygiwyd yn ystod Ystyriaeth Fanwl y Pwyllgor, ar 17 Chwefror 2023.¹⁶

¹⁶ Bil yr Amgylchedd Hanesyddol (Cymru), fel y'i diwygiwyd yn ystod Ystyriaeth Fanwl y Pwyllgor

3. Argymhelliad i'r Senedd

17. Rydym yn nodi i'r Cwnsler Cyffredinol fynd i'r afael yn ystod Ystyriaeth Fanwl y Pwyllgor â'r materion yn y Bil a nodwyd yn ein hadroddiad Ystyriaeth Gychwynnol.¹⁷

18. Rydym yn fodlon ar y wybodaeth a ddarparwyd gan y Cwnsler Cyffredinol ynghylch sut y bydd Llywodraeth Cymru yn bwrw ymlaen â chynlluniau i adolygu'r holl ddeddfwriaeth sy'n ymwneud â gwarchod safleoedd llongddrylliadau hanesyddol a'r amserlen ddisgwyliedig ar gyfer ymgymryd â gwaith o'r fath.

19. Rydym yn nodi y bydd y Cwnsler Cyffredinol yn diweddarau'r deunydd esboniadol sy'n cyd-fynd â'r Bil, gan gynnwys y Memorandwm Esboniadol a Nodiadau'r Drafftwyd.¹⁸

Argymhelliad i'r Senedd

Yn unol â Rheol Sefydlog 26C.36, rydym o'r farn y dylai'r Bil symud ymlaen i'r Cyfnod Terfynol.

¹⁷ Gweler yr Adroddiad ar Fil yr Amgylchedd Hanesyddol (Cymru), paragraffau 299, 300, 305, 306 a 343.

¹⁸ Gweler, er enghraifft, yr Adroddiad ar Fil yr Amgylchedd Hanesyddol (Cymru), paragraffau 166, 167 a 321.